

摘藻堂四庫全書薈要

集部

欽定四庫全書薈要

集部

騎省集卷一至三

臣 王杰 詳校
詳校官助教 臣 常循



欽定四庫全書薈要

騎省集

提要

臣等謹案騎省集三十卷宋徐鉉撰鉉字鼎

臣洪州新建人仕南唐至右僕射與弟錯並
負重名宋師南伐錯卒於圍城中鉉入宋為
散騎常侍終靜難軍節度行軍司馬集三十
卷前二十卷仕南唐時作後十卷皆歸宋後



作其婿吳淑所編也天禧中都官員外郎胡克順得其本於陳彭年刊刻表進始行於世鉉博學多執詩以才調勝文有六朝初唐之體五季之末古文未行以當時文格而言亦歸然一巨手也李煜之歿太宗詔鉉為銘墓鉉請得伸故主之誼其文措詞有體尤為世所稱誦云乾隆四十二年十二月恭校上

總纂官臣紀昀臣陸錫熊臣孫士毅

總校官臣陸費墀



騎省集進表

臣克順言伏以德必有言見稱於君子文之行遠用示於方來矧逢熙盛之期茂闡欽明之化臣克順誠惶誠懼頓首頓首伏念臣本惟寒族偶襲緒風幼服佩於義方長陶蒸於孝治築室百堵介處於下鄉教子一經敢隳於素業旌閭雖慙於往事賜書寧謝於古人家藏稍多耳剝亦久竊見故散騎常侍徐鉉傑出江表夙負重名逮事天朝薦升近列特受先皇之顧遇頗為後進之

宗師文律高深學術精博辭惟尚要思在無邪克著一家之言蓋處諸公之右淳化之歲被病考終生歎伯道之孤歿慮若教之餒而臣頃在場屋獲造門牆情篤鄉關禮鈞甥姪永惟感舊適值送終臣家乃具扁舟載其靈柩直抵豫章之郡卜葬西山之阿一掩佳城久荒宿草雖歲時靡輟為修黃石之祠而翰墨罕存難訪茂陵之札每思編輯尤懼舛譌數年前故叅知政事陳彭年因臣屢言成臣夙志假以全本并茲冠篇乃募工人肇

形鏤板竹簡更寫無愧於前修綈几迴觀願留於睿覽
伏望崇文廣武感天尊道應真祐德上聖欽明仁孝皇
帝陛下清衷軫念鴻霈延慈稍迴虞舜之聰暫乙東方
之牘綸恩至厚俾朽骨以重榮垂範長新耀遺編而增
煥豈惟踈賤猶荷照臨其新印徐鉉文集西部計六十
卷共一十二冊謹隨表上進干冒宸嚴臣無任戰汗激
切之至臣克順誠惶誠懼頓首頓首謹言天禧元年十
一月日三司戶部判官朝散大夫行尚書都官員外郎

上護軍臣胡克順上表

批答

勅胡克順省所上表進新印徐鉉文集兩部計六十卷
共一十二冊事具悉徐鉉生於江介早著時名歷事祖
宗之朝嘗居文翰之任發揮誥命有溫雅之風備預咨
詢見該通之學矧惟素履無謝古人汝克慕前修盡編
遺札俾之摹印庶廣流傳覩奏御之爰來諒恪勤之斯
至覽觀之際嘉歎良深故茲獎諭想宜知悉

欽定四庫全書蒼薈要卷一萬四千九十六

集部

騎省集卷一

宋 徐鉉 撰

文賦三首

詩三十首

頌德賦

東宮生
日獻

伏惟先王之建國體皇極而垂制仰則觀於辰象俯則
察於地義前星為帝座之輔蒼震乃少陽之位非明德
與茂親不足膺茲主器故萬邦以貞而本枝百世是必
天賜嘉祉神輸百祥山河資其正氣日月分其融光膺

期運以載誕配乾坤而永昌者也惟我儲后昭明俊德
黃裳元吉沈潛剛克鈞深致遠曾莫挹其津涯問安視
膳每或形於顏色在昔沖讓高追太伯乃剖麟符保釐
東宅受道師傅稽疑典冊化自誠心風行邦國乃擁干
旌南徐之域左撫勾吳前對敬亭京師河潤盛德日新
其畏如夏其惠如春謝傅圍碁靜一方之沴氣條侯高
卧息萬里之驚塵令聞孔昭元功莫二人情不可以久
鬱皇統不可以終避乃畏天命允茲儲貳鳴玉軟以徐

來與春郊而德至龍樓霧廓雞戟風生珍符疊委和氣
交迎百度以之而式序多壘以之而載清史書有年衢
傳頌聲豈人事之協贊信宗祊之降靈於是玄圃凝陰
瑤山密雪宣猷之緹幕半下濛汜之曾冰乍結爰書慶
誕之日始過嘉平之節麗正晨啓重明夙設調護之容
娛侍之臣莪冠煒煜佩玉璘玢咸稽首而再拜獻多福
於萬春有官坊之下吏乃捧觴而進稱曰自古聖賢率
由輔導伊循名與課實故成敗之異效粵若成王史佚

周召左右前後惟仁與孝靡過不舉無善不告茲君臣
之一體故風聲之克劭降及後代亦慎厥初實聘四老
復延二疏咸由古道以佑皇儲若乃征和戾園有思臺
博望之盛貞觀承乾有玄齡魏徵之重或有其禮而無
人或有其人而不用何擇禍之忘輕信非賢而罔共英
英副君鑒古知今百揆在乎手萬務經其心朝廷之所
寄者重蒼生之所望者深既賞與王之諫亦訪百官之
箴故曰生民在勤好問則裕不躬不親人將孰信一遊

一豫樂有常度節八音以導其和平調五味以適其喜
怒情義兼於家國故知無不為愛敬極於君親故惟道
是諭儉以足用而施舍不可不行仁以接物而刑罰不
可不具冗官宜省而才不可遺疆事漸寧而備不可去
居安思危覩災而懼上分一人之憂以成天下之務俾
中外之禔福與宗祧而永固伊下臣之不佞蒙國士之
殊遇實含和而吐頌豈登高之能賦願降鑒於芻蕘庶
効誠於塵霧

木蘭賦并序

頃歲鉉左宦江陵官舍數畝委之而去庭有木蘭因移植
於宗兄之家及鉉徵還席不遑煖又竄於舒庸吾兄感
春物之載華擬古詩而見寄吟玩感歎謹以和焉雖不
足繼體物之作庶幾申騷客之情爾

伊庭中之竒樹惟木蘭之可悅外爛爛以凝紫內英英而

積雪芬芳兮謝客之囊旖旎兮仙童之節

仙人有
紫旌節

許蒲

茸之竊比聽蘭芽之並列於是辭下土之卑濕歷上京

之繁華恥街價於豪門乃托根於貧家資幽人之賞豫
有好事之稱嗟一旦逐客程遠君門路賒削閨籍與印
組豈獨留乎此花噫人屢遐棄花猶得地分兔苑之餘
蔭向藩房而吐媚授簡多暇攀條屬思持香草以予比
效騷辭而我寄感此生之百憂何斯物之足貴悲夫館
客長吟山城夕陰想馨香之不改歎歡宴之難尋憑歸
夢於飛翼寫商歌於素琴歌曰光景兮愁暮別離兮易
久真宰兮無黨貞心兮不朽誠知異日重滋田氏之荆

但恐相逢共歎桓公之柳

新月賦

庚午歲
宿直作

五月五日繁陰乍晴倬彼新月麗於太清映玉繩而絢
綵拵銀漢以騰精對鳩鵲西南之影步明光東北之楹
歷歷遲漏悠悠我情雖萬古之不易感一年而始生乃
有騷女痴男朱顏稚齒欣春物之駘蕩登春臺之靡迤
雜佩璫錯輕車颯纓紛乎拜祝怡然晏喜人歲歲以潛
換景年年而若此昔我當年胡云不然世路多故流

光暗遷易壯心於大觀變玄髮於華顛顧一毛之無
濟愧兩綬之徒然況乎萬象虛明九門奧秘對宣室
以方罷閱通宵而不寐憂心似醉既慷慨於君恩急
景如馳更悽涼於往事想翹月以長歌遂抽毫而見
意

早春左省寓直

旭景鸞臺旦微雲象闕間時清政事少日永直官閒遠
籟飛簫管零冰響佩環終軍年二十默坐叩玄關

寒食宿陳公塘上

垂楊界官道茅屋倚高坡
月下春塘水風中牧豎歌
折花閒立久對酒遠情多
今夜孤亭夢悠揚奈爾何

將去廣陵別史員外南齋

家聲曾與金張輩官署今居何
宋間起得高齋臨靜曲
種成竒樹學他山鴛鴦終日同
醒醉蘿薜常時共徃還
賤子今朝獨南去不堪迴首望清閒

將過江題白沙館

少長在維揚依然認故鄉金陵佳麗地不道少風光稍
望吳臺遠行登楚塞長殷勤語江嶺歸夢莫相妨

登甘露寺北望

京口潮來曲岸平海門風起浪花生人行沙上見日影
舟過江中聞櫓聲芳草遠迷揚子渡宿烟深映廣陵城
遊人鄉思應如橘相望須含兩地情

山路花

不共垂楊映綺寮倚山臨路自嬌饒遊人過去知香遠

谷鳥飛來見影搖半隔烟嵐遙隱隱可憐風雨暮蕭蕭
城中春色還如此幾處笙歌按舞腰

京口江際弄水

退公求靜獨臨川揚子江南二月天百尺翠屏甘露閣
數帆晴日海門船波澄瀨石寒如玉草接汀蘋綠似烟
安得乘槎更東去十洲風外弄潺湲

早春旬假獨直寄江舍人

省署皆歸沐西垣公事稀詠詩前砌立聽漏向申歸遠

思風醒酒餘寒雨濕衣春光已堪探芝蓋共誰飛

從駕東幸呈諸公

吳公臺下舊京城會揜衡門過十春別後不知新景象
信來空問故交親宦遊京口無高興習隱鍾山限俗塵
今日喜為華表鶴况陪鷓鷯免迷津

重遊木蘭亭

繚遶長堤帶碧潯昔年遊此尚青衿蘭橈破浪城陰直
玉勒穿花苑樹深宦路塵埃成久別仙家風景有誰尋

那知年長多情後重凭欄杆一獨吟

賦得綵鷺

縷綵成飛鷺迎和起蟄時翠翹生玉指繡羽拂文楣詎
費啣泥力無勞剪爪期化工今在此翻怪社來遲

送魏舍人仲甫為蘄州判官

從事蘄春興自長蘄人應識紫薇郎山資足後拋名路
莼菜秋來憶故鄉以道卷舒猶自適臨戎談笑固無妨
如聞郤閣吹橫笛時望青谿憶野王

題殷舍人宅木芙蓉

憐君庭下木芙蓉，嫋嫋纖枝淡淡紅。
曉吐芳心迎宿露，晚搖嬌影媚清風。
似含情態愁秋雨，暗減馨香借菊叢。
默飲數盃應未稱，不知歌管與誰同。

送史館高員外使嶺南

東觀時閒暇，還修諭蜀書。
雙旌馳縣道，百越從軺車。
桂蠹晨殮罷，貪泉訪古初。
春江多好景，莫使醉吟踈。

春日紫巖山期客不至

金史四庫全書
卷一
郊外春華好人家帶碧溪淺莎藏鴨戲輕靄隔雞啼掩
映紅桃谷黃綠翠柳堤王孫竟不至芳草自萋萋

宿蔣帝廟明日遊山南諸寺

便返城闈尚未甘更從山北到山南花枝似雪春雖半
桂魄如眉日始三松蓋遮門寒黯黯柳絲妨路翠氈氈
登臨莫怪偏留戀遊宦多年事事諳

賦得有所思

所思何在杳難尋路遠山長水復深衰草滿庭空佇立

清風吹袂更長吟
忘情好醉青田酒
寄恨宜調綠綺琴
落日鮮雲偏聚散
可能知我獨傷心

贈王貞素先生

先生嘗已佩真形
紺髮朱顏骨氣清
道秘未傳鴻寶術
院深時聽步虛聲
遼東幾度悲城郭
吳市終應變姓名
三十六天皆有籍
他年何處問歸程

春夜月

幽人春望本多情
况是花繁月正明
竟夕無言亦無寐

遶階芳草影隨行

愛敬寺有老僧嘗遊長安言秦雍間事歷歷可
聽因贈此詩兼示同行客

白首棲禪者嘗談灞滻遊能令過江客偏起失鄉愁
室倚桃花崦門臨杜若洲城中無此景將子剩淹留

遊蔣山題辛夷花寄陳奉禮

本約同遊陳不至故咏此

今歲遊山已恨遲山中仍喜見辛夷簪纓且免全為累
桃李猶堪別作期晴後日高偏照灼晚來風急漸披離

山郎不作同行伴折得何由寄所思

騎省集卷一

欽定四庫全書薈要卷一萬四千九十七

集部

騎省集卷二

宋 徐鉉 撰

詩六十九首 歌一首

和殷舍人蕭員外春雪

萬里春陰乍履端
廣庭風起玉塵乾
梅花嶺上連天白
蕙草階前特地寒
晴去便為經歲別
興來何惜徹宵看
此時鴛侶皆閒暇
贈答詩成禁漏殘

寄蘄中高郎中

賈傅棲遲楚澤東蘭皋三度換秋風紛紛世事來無盡
黯黯離魂去不通直道未能勝社鼠孤飛徒自歎冥鴻
知君多少思鄉恨併在山陽一笛中

寄和州韓舍人

急景駸駸度遙懷處處生風頭乍寒暖天色半陰晴久
別魂空斷終年道不行殷勤雲上雁為過歷陽城

從元龍武將軍歿於邊戍過舊營宅作

前年都尉歿邊城帳下何人領舊兵徼外瘴烟沈鼓角

山前秋日照銘旌
笙歌却反烏衣巷
部曲皆還細柳營
今日園林過寒食
馬蹄猶擬入門行

景陽臺懷古

六言

後主亡家不悔江南異代長
春今日景陽臺上聞人何
用傷神

春分日

仲春初四日春色正中分
綠野徘徊月晴天斷續雲燕
飛猶個個花落已紛紛
思婦高樓晚歌聲不可聞

寄駕部郎中瞻

賤子乖慵性頗為省直牽交親每相見多在相門前君
獨踈名路為郎過十年炎風久成別南望思悠然

和王庶子寄題允長建州廉使新亭

謝守高齋結構新一方風景萬家情羣賢詎減山陰會
遠俗初聞正始聲水檻片雲長不去訟庭纖草轉應生
阿連詩句偏多思遙想池塘晝夢成

謝文靜墓下作

時閩嶺用師
契丹陷梁宋

越徵稽天討周京亂戰塵蒼生何可奈江表更無人豈
憚尋荒壘猶思認後身春風白楊裏獨步淚沾巾

觀人讀春秋

日覺儒風薄誰將霸道羞亂臣無所懼何用讀春秋

秋日雨中與蕭贊善訪殷舍人於翰林座上作
野出西垣步步遲秋光如水雨如絲銅龍樓下逢閑客
紅藥階前訪舊知亂點乍滋承露處碎聲應想滴蓬時
銀臺鎖合須歸去不惜餘歡盡酒卮

送和州張員外為江都令

經年相望隔重湖，一旦相逢在上都。
塞詔官班聊慰否，理輪志氣尚存無。
由來聖代憐才子，始覺風清激懦夫。
若向西岡尋勝想，舊題名處為躊躇。

和明道人宿山寺

聞道經行處，山前與水陽。
磬聲深小院，燈影迥高房。
落宿依樓角，歸雲擁殿廊。
羨師閒未得，早起逐班行。

晚歸

暑服道情出烟街薄暮還風清飄短袂馬健弄連環水
靜聞歸櫓霞明見遠山過從本無事從此涉旬間

月真歌

廣陵妓人翰林殷舍人所
錄携之垂訪筵上贈此

揚州勝地多麗人其間麗者名月真月真初年十四五
能彈琵琶善歌舞風前弱柳一枝春花底嬌鶯百般語
揚州帝京多名流其間賢者殷德州德州初秉綸闈筆
職近名高常罕出花前月下或遊從一見月真如舊識
閑庭深院資賢宅宅門嚴峻無凡客垂簾偶坐唯月真

調弄琵琶即為拍殷即一旦過江去鏡中懶作孤鸞舞
朝雲暮雨鎮相隨石頭城下還相遇二月三月江南春
滿城濛濛起香塵隔牆試聽歌一曲乃是資賢宅裏人
綠窗繡幌天將曉殘燭依依香裊裊離腸却恨苦多情
軟障薰籠空悄悄殷即去冬入翰林九霄官署轉深沈
人間想望不可見唯向月真存舊心我慚闌茸何為者
長感餘光每相假陋巷蕭條正拚扉相携訪我衡茅下
我本山人愚且真歌筵飲食常無情自從一見月真後

至今贏得顛狂名
殷郎月真聽我語
少壯光陰能幾許
良辰美景數追隨
莫教長說相思苦

走筆送義興令趙宣輔

聞君孤棹汎荆谿
隴首雲隨別恨飛
杜牧舊居憑買取
他年藜杖願同歸

天闕山絕句

散誕愛山客
淒涼懷古心
寒風天闕晚
盡日倚軒吟

除夜

寒燈耿耿漏遲遲送故迎新了不欺往事併隨殘歷日
春風寧識舊容儀預慙歲酒難先飲更對鄉儻羨小兒
吟罷明朝贈知己便須題作去年詩

寄鍾謨

看看皤鬢二毛生昨日林梢又轉鶯欲對春風遺世慮
敢言樽酒名時英假中西閣應無事筵上南威幸有情
不得車公終不樂乞教紅袖出門迎

正初答鍾郎中見招

高齋遲景雪初晴
風拂喬枝待早鶯
南省郎官名籍籍
東隣伎女字英英
流年倏忽成陳事
春物依稀存舊情
新歲相思自過訪
不煩虛左遠相迎

聞雁寄故人

久作他鄉客
深慙薄宦非
不知雲上雁
何得每年歸
夜靜聲彌怨
天空影更微
往年離別淚
今夕重沾衣

江舍人宅筵上有妓唱和州韓舍人歌辭因以寄

良宵絲竹偶成歡中有佳人俯翠鬟白雪飄颻傳樂府
阮郎憔悴在人間清風朗月長相憶佩蕙紉蘭早晚還
深夜酒空筵欲散向隅惆悵髮堪斑

寒食日作

厨冷烟初禁門閒日更斜東風不好事吹落滿庭花過
社紛紛燕新晴淡淡霞京都盛遊觀誰訪子雲家

賀殷游二舍人入翰林江給事拜中丞

清晨待漏獨徘徊霄漢懸心不易裁閣老深嚴歸翰苑

夕郎威望拜霜臺青綾對覆蓬壺晚赤棒前驅道路開
猶有西垣廳記在莫忘同草紫泥來

歐陽大監雨中視決堤因墮水明日見於省中

因戲之

聞道張晨蓋徘徊石首東澹川非伯禹落水異三公衣
濕仍愁雨冠敝更怯風今朝復相見疑是葛仙翁

送吳郎中為宣州推官知涇縣

征虜亭邊月雞鳴伴客行可憐何水部今事謝宣城風

物聊供賞班資莫繫情同心不同載留滯為浮名

寄舒州杜員外

信到得君書知君已下車粉闈情在否蓮幕興何如人
望徵賢入余思從子居滯山真隱地憑為卜茅廬

九月十一日寄陳郎中

我多吏事君多病寂絕過從又幾旬前日龍山烟景好
風前落帽是何人

和司門郎中陳彥

衡門寂寂逢迎少不見仙郎向五旬莫問龍山前日事
菊花開却為閒人

賦得擣衣

江上多離別居人夜擣衣拂砧知露滴促杵恐霜飛漏
轉聲頻斷愁多力自微裁縫依夢見腰帶定應非

九月三十夜雨寄故人

獨聽空階雨方知秋事悲寂寥旬假日蕭颯夜長時別
念紛紛起寒更故故遲情人如不醉定是兩相思

寄撫州鍾郎中

時王師敗績於閩中謨在建州

去載分襟後尋文在建安封疆正多事蹲俎若為歎都
護空遺鏃明君欲舞干繞朝時不用非是殺身難

送歐陽大監遊廬山

家家門外廬山路唯有夫君乞假遊案牘乍拋公署晚
林泉已近洞天秋海潮盡處逢陶石江月圓時上庾樓
此去蕭然好長往人間何事不悠悠

立秋後一日與朱舍人同直

一宿秋風未覺涼
數聲宮漏日猶長
林泉無計消殘暑
虛向華池費稻粱

賦得霍將軍辭第

漢代承恩久
圖勲肯顧私
匈奴猶未滅
安用以家為
郢匠雖聞詔
衡門竟不移
寧煩張老頌
無待晏嬰辭
甲乙人徒費
親鄰我自持
悠悠千載下
長作帥臣師

和元帥書記蕭郎中觀習水師

元帥樓船出治兵
落星山外火旗明
千帆日助江陵勢

萬里風馳下瀨聲，殺氣曉嚴波上鷁。凱歌遙駭海邊鯨，
仲宣一作從軍詠，迴顧儒衣自不平。

秋日廬龍村舍

置却人間事，閒從野老遊。樹聲村店晚，草色古城秋。獨
鳥飛天外，閒雲度隴頭。姓名君莫問，山木與虛舟。

和蕭郎中小雪日作

征西府裏日西斜，獨試新爐自煮茶。籬菊盡來低覆水，
塞鴻飛去遠連霞。寂寥小雪閒中過，斑駁輕霜鬢上加。

算得流年無奈處，莫將詩句祝蒼華。

中書相公谿亭閒宴依韻

李建勳

雨霽秋光晚，亭虛野興迴。
沙鷗掠岸去，溪水階來客。
傲風敲情筵，香菊在盃東。
山長許醉何事，憶天台。

寄饒州王郎中效李白體

珍重王夫子，交情尚在不蕪城。
連宅住，楚塞并車遊，別後官三改。
年來歲六周，銀鈎無一字，何以緩離愁。

寄歙州呂判官

任君郡占好山川谿水縈迴路屈盤南國自來推勝境
故人此地作郎官風光適意須留戀祿秩資貧且喜歡
莫憶班行重迴首是非多處是長安

宣威苗將軍貶官後重經故宅

蔣山南望近西坊亭館依然鎖院牆天子未嘗過細柳
將軍尋已成燉煌

史萬歲嘗
謫成燉煌

敬傾怪石山無色零落圓

荷水不香為將為儒皆寂寞門前愁殺馬中郎

附池州薛郎中書因寄歙州張員外

新安從事舊臺郎直氣多才不可忘一旦江山馳別夢
幾年簪紱共周行歧分出處何方是情共窮通此義長
因附鄰州寄消息接輿今日信為狂

寄江都路員外

吾兄失意在東都聞說襟懷任所如已縱乖慵為傲吏
有何關鍵制豪胥縣齋曉閉多移病南畝秋荒憶遂初
知道故人相憶否嵇康不得懶修書

張員外好茅山風景求為句容令作此送

句曲山前縣依依數舍程還同適勾漏非是厭承明柳
谷供詩景華陽契道情金門容傲吏官滿且還城

送應之道人歸江西

曾騎竹馬傍洪崖二十餘年變物華客夢等閒過驛閣
歸帆遙羨指龍沙名題小篆矜垂露詩作吳吟對綺霞
歲暮定知迴未得信來憑為寄梅花

送元帥書記高郎中出為婺源建威軍使

寒風蕭瑟楚江南記室戎裝掛錦帆倚馬未曾妨笑傲

斬牲先要屬威嚴危言昔日嘗無隱壯節今來信不凡
唯有盃盤思上國酒醪甜淡菜蔬穠

遊方山宿李道士房

從來未面李先生借我西窗卧月明二十三家同願識
素驪何日暫還城

題畫山石

彼美巉巖石誰施黼藻功回巖明照地絕壁爛臨空錦
段鮮須濯羅屏展易窮不因秋蘚綠非假晚霞紅羽客

藏書洞樵人取箭風靈蹤理難問仙路去何通返駕歸
塵裏留情向此中迴瞻畫圖畔遙羨面山翁

臨石步港

碕岸隨縈帶微風起細漣綠陰三月後倒影亂峯前吹
浪浮鱗小黏苔碎石圓會將腰下組換取釣魚船

病題二首

性靈慵懶百無能唯被朝參遣夙興聖主優容恩未答
丹經疎闊病相陵脾傷對客偏愁酒眼暗看書每媿燈

進與時乖不知退可憐身計謾騰騰

人間多事本難論况是人間懶慢人不解養生何怪病
已能知命敢辭貧向空吐吐煩書字與世滔滔莫問津
金馬門前君識否東方曼倩是前身

寄江州蕭給事

夕郎憂國不憂身今向天涯作逐臣
魂夢暗馳龍闕曙嘯吟閒繞虎谿春
朝車載酒過山寺諫紙題詩寄野人
惆悵懦夫何足道自離羣後已同塵

和州江中丞見寄

賈傅南遷久江關道路遙
北來空見雁西去不如潮
鼠穴依城社鴻飛在沆寥
高低各有處不擬更相招

和鍾郎中送朱先輩還京垂寄

分司洗馬無人問辭客殷勤輟棹過
蒼蘚滿庭行徑小
高梧臨檻雨聲多春愁盡付千盃酒
鄉思遙聞一曲歌
且共勝遊消永日西岡風物近如何

送郝郎中為浙西判官

大藩從事本優賢幕府仍當北固前
花繞樓臺山倚郭
寺臨江海水連天
恐君到即忘歸日
憶我遊曾歷二年
若許他時作閭伴
殷勤為買釣魚船

翰林游舍人清明日入院中塗見過余明日亦
入西省上直因寄游君

榆柳凋新燭梨花發故枝
輜輶隘城市圭組坐曹司
獨對芝泥檢遙憐白馬兒
禁林還視草氣味兩相知

陪王庶子遊後湖涵虛閣

東宮閣

懸圃清虛乍過秋看山尋水上茲樓輕鷗的的飛難沒
江葉紛紛晚更稠風捲微雲分遠岫浪搖晴日照中洲
躋攀況有康華客如在南皮奉勝遊

柳枝詞十二首

把酒憑君唱柳枝也從絲管遞相隨逢春只合朝朝醉
記取秋風落葉時

南園日暮起春風吹散楊花雪滿空不惜楊花飛也得
愁君老盡臉邊紅

陌上朱門柳映花
簾鈎半捲綠陰斜
憑郎暫駐青驄馬
此是錢塘小小家

夾岸朱欄柳映樓
綠波平漫帶花流
歌聲不出長條密
忽地風迴見綠舟

老大逢春揔恨春
綠楊陰裡最愁人
舊遊一別無因見
嫩葉如眉處處新

濛濛堤畔柳含烟
疑是陽和二月天
醉裡不知時節改
漫隨兒女打鞦韆

水閣春來乍減寒
曉粧初罷倚闌杆
長條亂拂春波動
不許佳人照影看

柳岸烟昏醉裡歸
不知深處有芳菲
重來已見花飄盡
唯有黃鶯轉樹飛

此去仙源不是遙
垂楊深處有朱橋
共君同過朱橋去
密映垂楊聽洞簫

暫別揚州十度春
不知風景屬何人
一帆歸客千條柳
腸斷東風揚子津

仙樂春來按舞腰清聲偏是傍嬌嬈應綠鶯舌多情賴
長向雙成說翠條

鳳笙臨檻不能吹舞袖當筵亦自疑唯有美人多意緒
解衣芳態畫雙眉

騎省集卷二

欽定四庫全書薈要卷一萬四千九十八

集部

騎省集卷三

宋 徐鉉 撰

詩七十五首

貶官秦州出城作

浮名浮利信悠悠四海干戈痛主憂
三諫不從為逐客一身無累似虛舟
滿朝權貴皆曾忤繞郭林泉已遍遊
唯有戀恩終不改半程猶自望城樓

過江

別路知何極，離腸有所思。登艫望程遠，搖櫓過江遲。斷岸烟中失，長天水際垂。此心非橘柚，不為兩鄉移。

經東都太守橋

綸闈放逐知何道，桂苑風流且暫歸。莫問升僊橋上客，身謀疎拙舊心違。

贈維揚故人

東京少長認維桑，書劍誰教入帝鄉。一事無成空放逐，故人相見重淒涼。樓臺寂寞官河晚，人物稀疏驛路長。

莫怪臨風惆悵久十年春色憶維揚

秦州道中却寄東京故人

風緊雨淒淒川迴岸漸低吳州林外近隋苑霧中迷聚
散紛如此悲歡豈易齊料君殘酒醒還聽子規啼

得浙西郝判官書未及報聞燕王移鎮京口因
寄此詩問方判官田書記消息

秋風海上久離居曾得劉公一紙書淡水心情長若此
銀鈎蹤跡更無如嘗憂座側飛鴉鳥未暇江中覓鯉魚

今日京吳建朱印問君誰共曳長裾

贈陶使君求梨

昨宵宴罷醉如泥惟憶張公大谷梨
白玉花繁曾綴處
黃金色嫩乍成時
冷侵肺膈醒偏早
香惹衣襟歇倍遲
今日中山方酒渴
唯應此物最相宜

陳覺放還至秦州見寄以詩作此荅之

朱雲曾為漢家憂
不怕交親作世仇
壯氣未平空咄咄
狂言無驗信悠悠
今朝我作傷弓鳥
却羨君為不繫舟

勞寄新詩平宿憾此生心氣貫清秋

王三十七自京垂訪作此送之

失鄉遷客在天涯門揜苔垣向水斜只就鱗鴻求遠信
敢言車馬訪貧家烟生柳岸將垂縷雪壓梅園半是花
惆悵明朝樽酒散夢魂相送到京華

陶使君挽歌二首

太守今何在行春去不歸筵空收管吹郊迥儼驂駢營
外星纔落園中露已晞傷心梁上燕猶解向人飛

始憶花前宴笙歌醉夕陽那堪城外送衰晚
逐歸艤鈴閣朝猶閉風亭日已昏唯餘遷客淚
沾灑後池傍

雪中作

賦分多情客經年去國心疎鐘寒郭晚密雪水
亭深影迥鴻投渚聲愁雀噪林他鄉一樽酒獨
坐不成斟

賦得風光草際浮

宿露依芳草春郊古陌傍風輕不盡偃日早未
晞陽耿耿依平遠離離入望長映空無定綵飄
徑有餘光颭若

荷珠亂紛如燭火
颺詩人多感物凝思
繞池塘

寒食成判官垂訪因贈

常年寒食在京華
今歲清明在海涯
遠巷蹋歌深夜月
隔牆吹管數枝花
鴛鴦得路音塵濶
鴻雁分飛道里賒
不是多情成二十
斷無人解訪貧家

送客至城西望圖山因寄浙西府中

枚叟鄒生笑語同
莫嗟江上聽秋風
君看逐客思鄉處
猶在圖山更向東

送寫真成處士入京

傳神踪跡本來高
澤畔形容媿彩毫
京邑功臣多佇望
凌烟閣上莫辭勞

九日雨中

茱萸房重雨霏微
去國逢秋此恨稀
目極暫登臺上望
心遙長向夢中歸
荼蘼路遠愁霜早
兄弟鄉遙羨雁飛
唯有多情一枝菊
滿盃顏色自依依

寄外甥苗武作

放逐今來瘴海邊
親情多在鳳臺前
且將聚散為閒事
須信華枯是偶然
蟬噪疎林村倚郭
鳥飛殘照水連天
此中唯欠韓康伯
共對秋風詠數篇

寄從兄憲兼示二弟

別路吳將楚
離憂弟與兄
斷雲驚晚吹
秋色滿孤城
信遠鴻初下
鄉遙月共明
一枝棲未穩
迴首望西京

附書與鍾郎中因寄京妓越賓

暮春橋下手封書

海陵橋名

寄向江南問越姑
不道諸郎少

歡笑經年相別憶儂無

鍾代答

一幅輕綃寄海濱
越姑長感昔時恩
欲知別後情多少
點點憑君看淚痕

亞元舍人不替深知猥貽佳作二篇清絕不敢
輕酬因為長歌聊以為報未竟復得子喬校
書示問故兼寄陳君庶資一笑耳

海陵城裏春正月
海畔朝陽照殘雪
城中有客獨登樓

遙望天邊白銀闕

天帝以黃金
白銀為宮闕

白銀闕下何英英雕鞍

繡轂趨承明閭門曉闢旌旗影玉墀風細佩環聲此處

追隨皆俊彥當年何事容疵賤懷鉛晝坐紫微宮焚香

夜直明光殿王言簡靜官司閒朋好殷勤多徃還新亭

風景如東洛卽嶺林泉似北山光陰暗度盃盃裏職業

未妨談笑間有時邀賓復携妓造門不問都非是酣歌

叫笑驚四鄰賦筆縱橫動千字任他銀箭轉更籌不怕

金吾司夜吏可憐諸貴賢且才時情物望兩無猜伊余

獨稟狂狷性，褊量多言仍。薄命吞舟可，漏豈無恩負。乘

自貽非不幸，一朝削跡為遷客。旦暮青雲千里，隔離鴻

別雁，各分飛。折柳攀花兩無色。盧龍渡口問迷津，瓜步

山前送暮春。

去年三月三十日瓜步阻風

白沙江上曾行路，青林花

落何紛紛。漢皇昔幸回中道。

昇元中扈駕東遊之路

極目牛羊卧

芳草，舊宅重遊盡隙荒。故人相見多衰老，禪智寺山光

橋風瑟瑟兮，雨瀟瀟。行盃已醒殘夢斷，征途未極離魂

消。海陵郡中陶太守相逢，本是隨行舊。乍申拜起已開

眉却問辛勤還執手精廬外榭最清幽一稅征車聊駐
留閉門思過謝來客知恩省分寬離憂郡齋勝境有後
池山亭菌閣互參差有時虛左來相召舉白飛觴任所
為多才太守能搗鼓醉送金船間歌舞酒酣耳熱眼生
花暫似京華歡會處歸來旅館還端居清風朗月夜窗
虛駸駸流景歲云暮天涯望斷故人書春來憑檻方歎
息仰頭忽見南來翼足繫紅箋隨我前引頸長鳴如有
言開緘試讀相思字乃是多情喬亞元短韻三篇皆麗

絕小梅寄意情偏切

亞元詩云借問小梅應得信
春風新自海邊來此篇尤佳

金蘭

投分一何堅銀鈎置袖終難滅醉後狂言何足竒感君

知己不相遺長卿曾作美人賦玄成今有青躬詩

鉉去
春醉

中贈醉妓長歌酷為喬君
所賞來篇所引故以謝之

報章欲託還京信筆拙紙窮

情未盡珍重芸香陳子喬亦解貽書遠相問寧須買藥

療羈愁只恨無書消鄙吝

子喬問藥物所要又
問置新書故有此句

遊處當

時靡不同歡娛今日西成空天子尚應憐賈誼時人未

要嘲揚雄曲終筆閣緘封已翩翩驛騎行塵起寄向中

朝謝故人為說相思意如此

送蒯司錄歸京

早年間有蒯先生二十餘年道不行
抵掌曾論天下事
折腰猶悟俗人情
老還上國歡娛少
貧聚歸資結束輕
遷客臨流倍惆悵
冷風黃葉滿山城

聞查建州陷賊寄鍾郎中

謨即查
從事也

聞道將軍輕壯圖
螺城江下委犀渠
旌旗零落沉荒服
簪履蕭條返故居
皓首應全蘇武節
故人誰得李陵書

自憐放逐無長策空使盧諶淚滿裾

還過東都留守周公筵上贈座客

賈生三載在長沙故友相思道路賒
已分終年甘寂寞豈知今日返京華
麟符上將恩偏厚隋苑留歡日欲斜
明旦江頭倍惆悵遠山芳草映殘霞

送楊郎中唐員外奉使湖南

江邊微雨柳條新握節含香上使臣
兩綬對懸雲夢日方舟齊汎洞庭春
今朝草木逢新律昨日山川滿戰塵

同是多情懷古客不妨為賦吊靈均

表弟包穎見寄

此子侍親在饒州累年卧疾

常思帝里奉交親別後光陰屈指頻
蘭佩却歸綸閣下荆枝猶寄楚江濱
十程山水勞幽夢滿院烟花醉別人
料得此生強健在會須重賞昔年春

和

平生中表最情親浮世那堪聚散頻
謝朓却令歸省閣劉楨猶自卧漳濱
舊遊半似前生事要路多逢後進人

且喜新吟報強健明年相望杏園春

寄蕭給事

蕭江西
致仕

危言危行古時人歸向西山卧白雲
買宅尚尋徐處士
冷霞終訪許真君容顏別後應如故
詩詠年來更不聞
今日城中春又至落花愁緒共紛紛

送鍾員外詩并序

歲辛亥冬十月天子命吾友德林為東府亞尹太弟諭
德蕭君約諸客餞於石頭城雲日蒼茫園林搖落罇酒

將竭征帆欲飛處者眷眷而不能迴行者遲遲而不忍
去烟生景夕風靜江平君子曰公足以滅私子當促棹
詩所以言志我當分題故以風月松竹山石寄情於贈
別云爾兵部員外郎知制誥徐鉉序

賦石奉送德林少戶員外 鉉上

我愛他山石中含絕代珍烟披寒落落沙淺靜磷磷翠
色辭文陞清聲出泗濱扁舟載歸去知是泛槎人

賦月 蕭彥上

麗漢金波滿當筵玉笋傾因思頻聚散幾復換虧盈光
徹離襟冷聲符別管清那堪還自比西地倚樓情

賦竹 孫峴山上

萬物中瀟灑修篁獨逸羣貞姿會冒雪高節欲凌雲細
韻風初發濃烟日正曛因題偏惜別不可暫無君

賦松 謝仲宣上

送人多折柳唯我獨吟松若保歲寒在何妨霜雪重森
梢逢靜境廓落見孤峰還似君高節亭亭堪繼踪

賦風 王沂上

靜追蘋末興况復值蕭條
猛勢資新雁寒聲伴暮潮
過山雲散亂經樹葉飄颻
今日烟江上征帆望望遙

賦山別諸知己 鍾禕上

暮景江亭上雲山日望多
只愁辭輦鼓長恨隔嵯峨
有意圖功業無心憶薜蘿
親朋將遠別且共醉笙歌

贈秦州掾令狐克已

文公曾孫

念子多才命且奇亂中拋擲
少年時深藏七澤衣如雪

却見中朝髻似絲，舊德在人終遠。
大扁舟為吏，莫推辭。
孤芳自愛凌霜處，詠取文公白雪詩。

送荻栽與秀才宗觀

羨子清吟處，茅齋面碧流。
解憎蓮艷俗，唯欠荻花幽。
鷺立低枝晚，風驚折葉秋。
贈君須種此，不必樹忘憂。

使浙西先寄獻燕王侍中

京江風靜喜乘流，極目遙瞻萬歲樓。
喜氣籠蔥甘露晚，水烟淡沲海門秋。
五年不見鸞臺長，明日將陪兔苑遊。

欲問平臺門下吏相公還許吐茵不

常州驛中喜雨

颯颯旱天雨涼風一夕迴遠尋南畝去細入驛亭來
策唱牛初牧漁歌棹正開盈庭頓無事歸思酌金罍

驛中七夕

七夕雨初霽行人正憶家江天望河漢水館折蓮花
獨坐涼何甚微吟月易斜今年不乞巧鈍拙轉堪嗟

贈浙西顧推官

盛府賓寮八十餘，閉門高臥興無如。
梁王苑裏相逢早，潤浦城中得信踈。
狼籍盃盤重會面，風流才調一如初。
願君百歲猶強健，他日相尋隱士廬。

贈浙西妓亞仙筵上作

翠黛嚙如怨，朱顏醉更春。
占將南國貌，惱殺別家人。
粉汗沾巡盞，花鈿逐舞茵。
明朝綺窗下，離恨兩殷勤。

回至瓜洲獻侍中

紫微垣裏舊賓從，來向吳門謁府公。
奉使謬持嚴助節，

登門初識魯王宮
笙歌隱隱違離後
烟水茫茫悵望中
日暮瓜洲江北岸
兩行清淚滴西風

邵伯埭下寄南陸陳郎中

故人相別動經年
候館相逢倍慘然
顧我飲冰難輟棹
感君扶病為開筵
河灣水淺翹秋鷺
柳岸風微噪暮蟬
欲識酒醒魂斷處
謝公祠畔客亭前

謫居舒州累得韓高二舍人書作此寄之

三峯烟靄碧臨谿
中有騷人理釣絲
會友少於分袂日

謫居多却在朝時丹心歷歷吾終信俗慮悠悠爾不知
珍重韓君與高子殷勤書札寄相思

舒人以潛曉
天柱為三峯

和張先輩見寄二首

去國離羣擲歲華病容憔悴愧丹砂谿連舍下衣長潤
山帶邊城日易斜幾處垂鈎依野岸有時披褐到鄰家
故人書札頻相慰誰道西京道路賒

清時淪放在山州筇杖紗巾處處遊野日蒼茫悲鵬舍
水風陰濕弊貂裘鷄鳴候旦寧辭晦松節凌霜幾換秋

兩首新詩千里道感君情分獨知丘

印秀才至舒州見尋別後寄詩依韻和

羈遊白社身雖屈高步詞場道不卑投分共為知我者
相尋多媿謫居時離懷耿耿年來夢厚意勤勤別後詩
今日谿邊正相憶雪晴山秀柳絲垂

行園樹

松節凌霜久蓬根逐吹頻羣生各有性桃李但爭春

題雷公井

揜靄愚公谷蕭寥羽客家俗人知處所應為有桃花

送彭秀才

賈生去國已三年短褐閒行皖水邊盡日野雲生舍下
有時京信到門前無人與和投湘賦愧子來浮訪戴船
滿袖新詩好迴去莫隨騷客醉林泉

移饒州別周使君

正憐東道感賢侯何幸南冠脫楚囚皖伯臺前收別宴
喬公亭下艤行舟四年去國身將老百郡徵兵主尚憂

更向鄱陽湖上去青衫憔悴淚交流

避難東歸依韻和黃秀才見寄

感感逢人問所之東流相送向京畿自甘逐客紉蘭佩
不料平民著戰衣樹帶荒村春冷落江澄霽色霧霏微
時危道喪無才術空手徘徊不忍歸

訓郭先輩

太原郭夫子行高文炳蔚弱齡負世譽一舉遊月窟

閩

仙籍及我竄羣舒向風心懋懋懋歸來

暮江上雲霧一披拂雷雨不下施猶作池中物念君介然
氣感時思奮發示我數篇文與古爭馳突綵縟祭英華理
深刮肌骨古詩尤精奧史論更宏拔舉此措諸民何憂民
不活吁嗟吾道薄與世長迂濶顧我徒有心數奇身正絀
論兵屬少年經國須儒術夫子無自輕蒼生正愁疾

和集賢鍾郎中

石渠冊府神仙署當用明朝第一人腰下別懸新印綬
座中皆是故交親龍池樹色供清景浴殿香風接近鄰

從此翻飛應更遠徧尋三十六天春

送劉山陽

舊族知名士朱衣宰楚城所嗟無道薄豈是主恩輕戰
鼓何時息儒冠獨自行此心多感激相送若為情

題伏龜山北隅

茲山信岑寂陰崖積蒼翠水石何必多宛有千巖意孰
知近人境旦暮含佳氣池影搖輕風林光淡新霽支頤
藉芳草自足忘世事未得歸去來聊為宴居地

送黃梅江明府

江前為江夏令有善政今更宰小邑賦詩留別作此和之

封疆多難正經綸
臺閣如何不用君
江上又勞為小邑
篋中徒自有雄文
書生膽氣人誰信
遠俗歌謠主不聞
一首新詩無限意
再三吟咏向秋雲

咏梅子真送郭先輩

忠臣本愛君仁人本愛民
寧知貴與賤豈計名與身
梅生為一尉獻疏來君門
君門深萬里金虎重千鈞
向水且不可

劉向谷永

况復論子真拂衣遂長往
高節邈無鄰至

今仙籍中謂之梅真人郭生負逸氣百代繼遺塵進退
生自知得喪吾不陳斯民苟有幸期子一朝伸

和蕭郎中午日見寄

細雨輕風採藥時
褰簾隱几更何為
豈知澤畔紉蘭客
來赴城中角黍期
多罪靜思如剉蘖
救書才聽似含飴
謝公制勝常閒暇
願接西州敵手碁

送黃秀才姑孰辟命

世亂離情苦
家貧色養難
水雲孤棹去
風雨暮春寒
暮

府才方急騷人淚未乾何時王道泰萬里看鵬搏

送王四十五歸東都

海內兵方起離筵淚易垂憐君負米去惜此落花時想
憶看來信相寬指後期殷勤手中柳此是向南枝

和太常蕭少卿近郊馬上偶吟

田園經雨綠分畦飛蓋閒行九里堤拂袖清風塵不起
滿川芳草路如迷林開始覺晴天迥潮上初驚浦岸齊
怪得仙郎詩句好斷霞殘照近山西

又和

抱甕何人灌藥畦
金銜為爾駐平堤
村樓野店情無限
綠水晴天思欲迷
橫笛乍隨輕吹斷
歸帆疑與遠山齊
鳳城廼望真堪畫
萬戶千門蔣嶠西

拋球樂辭二首

歌舞送飛球
金觥碧玉籌
管絃桃李月
簾幕鳳凰樓
一笑千場醉
浮生任白頭

灼灼傅花枝
紛紛度畫屏
不知紅燭下
照見綵球飛
借

勢因期尅巫山暮雨歸

離歌辭五首

莫折紅芳樹但

平聲

知盡意看狂風幸無意那忍折教殘

朝日城南路旌旗照綠蕪使君何處去桑下覓羅敷

事與年俱徃情將分共深莫驚容髮改只是舊時心

暫別勞相送佳期願莫違朱顏不須老留取待郎歸

拂匣收珠佩迴燈拭薄粧莫嫌春夜短正似楚襄王

夢遊三首

魂夢悠揚不奈何夜來還在故人家香濛蠟燭時時暗
戶映屏風故故斜檀的慢調銀字管雲鬟低綴折枝花
天明又作人間別洞口春深道路賒

繡幌銀屏杳靄間若非魂夢到應難窗前人靜偏宜夜
戶內春濃不識寒蘸甲遞觴纖似玉含詞忍笑膩於檀
錦書若要知名字滿縣花開不姓潘

南國佳人字玉兒芙蓉雙臉遠山眉仙郎有約長相憶
阿母無猜不得知夢裏行雲還倏忽暗中攜手乍疑遲

因思別後閨窗下織得迴文幾首詩

騎省集卷三

謹案卷一第一頁後七行元功莫二原本莫訛獎
今改

第四頁前八行貞心兮不朽原本朽訛改今改

第四頁後八行景年年而若此原本景下衍色字

今刪

第六頁前四行人行沙土見日影原本行訛生據

宋詩鈔改

第八頁後八行衰草滿空庭佇立原本佇訛仲今

改

卷二第三頁前八行不惜餘歡盡酒卮原本盡訛
蓋據宋詩鈔改

第三頁後七行落宿依樓角原本樓訛樓又羨師
間未得原本間訛開並據宋詩鈔改

第四頁前六行揚州帝京多名流原本流訛賢今
改

第九頁後五行姓名今莫問原本君訛居據宋詩

鈔改

第十三頁後六行高梧臨檻雨聲多原本檻訛楹

今改

卷三第三頁後二行風亭日已昏按昏字出韻疑

訛

第五頁前六行信遠鴻初下原本信遠訛遠信據

宋詩鈔改

第九頁前七行平生中表最情親原本親訛深又

謝朓却令歸省閣原本令訛吟並據宋詩鈔改
第十三頁前五行河灣水淺翹秋鷺原本秋訛愁
據宋詩鈔改

第十三頁前七行累得韓高二舍人書原本韓訛
薛按詩中有珍重韓君與高子句今據改

第十七頁後三行離筵淚易垂原本垂訛流又想
憶看來信原本想訛相並據宋詩鈔改



總校官庶吉士臣張能照

校對官學正臣李巖

謄錄監生臣蔣繼煥

欽定四庫全書薈要

集部

騎省集卷四

五

詳校官助教臣常循



欽定四庫全書薈要卷一萬四千九十九


集部

騎省集卷四

宋 徐鉉 撰

詩七十二首

和蕭少卿見慶新居


湘浦懷沙已不疑
京城賜第豈前期
鼓聲到晚知坊遠
山色來多與靜宜
簪屨尚應憐故物
稻粱空自媿華池
新詩問我偏饒思
還念鷓鴣得一枝

又和

驚蓬偶駐知多幸，斷雁重聯愜素期。
當戶小山如舊識，上牆幽蘚最相宜。
清風不去因栽竹，隙地無多也鑿池。
更喜良鄰有嘉樹，綠陰分得近南枝。

送勲道人之建安

下國兵方起，君家義獨聞。
若為輕世利，歸去卧溪雲。
挂席衝嵐翠，携筇破蘚紋。
離情似霜葉，江上正紛紛。

送許郎中歙州判官兼黟縣

嘗聞黟縣似桃源，况是優悠冠玳筵。
遺愛非遥應卧理，

祖風猶在好尋仙

許宣平點
人得道

朝衣舊識熏香史
祿米初

營種秫田大抵宦遊須自適
莫辭離別二三年

送彭秀才南遊

問君孤棹去何之
玉筍春風楚水西
山上斷雲分翠靄
林間晴雪入澄溪
琴聲酒趣神相會
道士仙童手共携
他日時清更隨計
莫如劉阮洞中迷

和明上人除夜見寄

酌酒圍爐久
愁襟默自增長年
逢歲暮多病見兵興
夜

色開庭燎寒威入硯水湯師無別念吟坐一燈凝

正初和鄂州邊郎中見寄

潦倒含香客淒涼賦鵬人未能全卷舌終擬學垂綸故
友睽離久音書問訊頻相思俱老大又見一年新

送劉司直出宰

之子有雄文風標秀不羣低飛從墨綬逸志在青雲柳
色臨流動春光到縣分賢人多靜理未爽醉醺醺

送從兄赴臨川幕

梁王藉寵就東藩還名鄒枚坐兔園今日好論天下事
昔年同受主人恩石頭城下春潮滿金柅亭邊綠樹繁
唯有音書慰離別一盃相送別無言

送龔員外赴江州幕

煩君更上築金臺世難民勞藉俊才自有聲名馳羽檄
不妨談笑奉樽壘元規樓迥清風滿匡俗仙春畫障開
莫忘故人離別恨海潮迴處寄書來

送朱先輩尉廬陵

我重朱夫子依然見古人成名無媿色得祿及慈親莫
歎官資屈寧論活計貧平生心氣在終在靜邊塵

送德林郎中學士赴東府詩

并序

德林始以才術優贍入叅近司旋以地望清雅寵登書
殿會東畿克復上以君有遺愛於江淮之都故輟侍從
之班攝尹正之任吾一二親友共餞行舟鉉也不才請
以言贈理大國若烹小鮮言不可挽之也况亂後乎德
林當本仁守信體寬務斷大兵之後民各思又聽其自

理任其自營為之上者導其蒙遏其淫而已示之以聰
明則民益迷拘之以禁令則民重困棄仁則吏暴失信
則衆惑急則民傷不斷則民懈慎此四者何往而不臧
噫嘻吾黨皆忘形者也平生以來胥會者幾何思當鷄
犬相聞舟輿不接開口而笑攜手而遊在吾輩勉之而
已忘身徇國急病讓夷德林此行量減離戀盍各賦一
物以為贈乎九月十七日序

得江奉送德林郎中學士
喬舜上

摻袂向江頭朝宗勢未休何人秉桂楫之子過揚州
颯颯沙雁漂漂逐浪鷗欲知離別恨半是淚和流

得酒 徐鉉上

酌此杯中物茱萸滿把秋今朝將送別他日是忘憂世
亂方多事年加易得愁政成頻一醉亦未減風流

得菊 蕭彧上

離情折楊柳此別異春哉含霧東籬艷汎香南浦杯惜
持行次贈留揅醉中迴暮齒如能制玉山甘判顏

得遠山 徐鉉上

瓜步妖氛滅崑岡草樹青
終朝空極望今日送君行
報政秋雲靜微吟曉月生
樓中長可見持用減離情

得水 陳元裕上

上善湛然秋思波洽帝猷
謾言生險浪豈爽見安流
汎去星槎遠澄來月練浮
滔滔對離酌入洛稱仙舟

得新鴻別諸同志 鍾蒨上

隨陽來萬里點點度遙空
影落長江水聲悲半夜風
殘

秋辭絕漠無定似驚蓬我有離羣恨飄飄類此鴻

送陳先生之洪井寄蕭少卿

聞君仙袂指洪厓我憶情人別路賒
知有歡娛遊楚澤更無書札到京華
雲開驛閣連江靜春滿西山倚漢斜
此處相逢應見問為言搔首望龍沙

送龔明府九江歸省

茂宰隳官去扁舟著綵衣
湓城春酒熟瓜阜野花稀
解纜垂楊綠開帆宿鷺飛
一朝吾道泰還逐落潮歸

和江西蕭少卿見寄二首

亡羊歧路媿司南，二紀窮通聚散三。
老去何妨從笑傲，病來看欲嬾朝參。
離腸似線常憂斷，世態如湯不可探。
珍重加餐省思慮，時時斟酒壓山嵐。

身遥上國三千里，名在朝中二十春。
金印不須辭入幕，麻衣曾此歎迷津。
卷舒由我真齊物，憂喜忘心即養神。
世路風波自翻覆，虛舟無計得沉淪。

送薛少卿赴青陽

我愛陶靖節吏隱從絃歌我愛費徵君高卧歸九華清
風激頽波來者無以加我志西不遂漂淪浩無涯數竒
時且亂此途今愈賒賢者薛夫子高舉凌晨霞安民即
是道投足皆為家功名與權位悠悠何用誇携朋出遠
郊酌酒藉平沙雲收遠天靜江濶片帆斜離懷與企羨
南望長咨嗟

送高起居之涇縣

右史罷朝歸之官句水湄別我行千里送君傾一卮酒

罷長歎息此歎君應悲亂中吾道薄鄉族舊人稀胡為
佩銅墨去此白玉墀吏事豈所堪民病何可醫藏用清
其心此外慎勿為縣郭有佳境千峰溪水西雲樹杳迴
合巖巒互蔽虧彈琴坐其中世事吾不知時時寄書札
以慰長相思

宿茅山寄舍弟

茅許稟靈氣一家同上賓仙山空有廟舉世更無人獨
徃誠違俗浮名亦累真當年各自勉雲洞鎮長春

晚憩白鶴廟寄句容張少府

日入林初靜，山空暑更寒。
泉鳴細巖竇，鶴唳眇雲端。
拂榻安碁局，焚香戴道冠。
望君殊不見，終日凭闌杆。

題紫陽觀

南朝名士富仙才，追步東鄉遂不回。
丹井自深桐暗老，祠宮長在鶴頻來。
巖邊桂樹攀仍倚，洞口桃花落復開。
惆悵霓裳太平事，一函真跡鏤高臺。

贈奚道士

含象

奚生曾有洞天期，猶傍天壇摘紫芝。
處世自能心混沌，全真誰見德支離。
玉霄壁閉人長在，金鼎功成俗未知。
他日飈輪謁茅許，願同雞犬去相隨。

題碧巖亭贈孫尊師

絕境何人識，高亭萬象含。
凭軒臨樹杪，送目極天南。
積竄生泉洞，歸雲鎖石龕。
丹霞披翠巘，白鳥帶晴嵐。
仙去留虛室，龍歸漲碧潭。
幽巖君獨愛，玄味我曾耽。
世上愁何限，人間事久諳。
終須脫羈鞅，來此會空談。

題白鶴廟

平生心事向玄關一入仙鄉似舊山
白鶴咲空情眇眇丹砂流澗暮潺潺
嘗嗟多病嫌中藥擬問真經乞小還
滿洞烟霞互陵亂何峯臺榭是蕭閒

步虛詞五首

氣為還元正心由把一靈凝神歸罔象
飛步入青冥整服乘三素旋網躡九星
瓊章開後學稽首奉真經

天帝黃金闕真人紫錦書霓裳紛蔽景
羽服迴陵虛白

鶴能為使班麟解駕車靈符終願借轉共世情疎
聖主過幽谷虛皇在藥宮五千宗物母七字祕神童世
上金壺遠人間玉鑰空唯餘養身法修此與天通

何處求玄解人間有洞天勤行皆是道謫下尚為仙蔽
景乘朱鳳排空駕紫烟不嫌園吏傲願在玉宸前
三素霏霏遠盟威凜凜寒火鈴空滅沒星斗曉闌干佩
響流虛殿爐烟在蘸壇蕭條不可及驂駕上雲端

留題

瑤壇蘸罷晚雲開羽客紛飛俗士迴為報移文不須勒
未曾遊處待重來

和陳洗馬山莊新泉新泉乃古跡洗馬所重修
也

已開山館待抽簪更要巖泉欲洗心常被松聲迷細韻
忽流花片落高岑便疏淺瀨穿莎徑始有清光映竹林
何日煎茶醞香酒沙邊同聽暝猿吟

奉和七夕應令

今宵星漢共晶光，應笑羅敷嫁侍郎。
斗柄易傾離恨促，河流不盡後期長。
靜聞天籟疑鳴佩，醉折荷花想艷粧。
誰見宣猷堂上宴，一篇清韻振金鐺。

又和八日

微雲疎雨淡新秋，曉夢依稀十二樓。
故作別離應有以，擬延更漏共無由。
那教人世長多恨，未必天仙不解愁。
博望苑中殘酒醒，香風佳氣獨遲留。

和印先輩及第後獻座主朱舍人郊居之作

成名郊外揜柴扉，樹影蟬聲共息機。
積雨暗封青蘚徑，好風輕透白莎衣。
嘉魚始賦人爭誦，荆玉頻收國自肥。
獨坐公廳正煩暑，喜吟新咏見玄微。

印以南有嘉魚賦及第

和致仕張尚書新創道院

梓澤成新致金丹，有舊情掛冠朝睡足。
隱几暮江清藥圃，分輕綠松窗起細聲。
養高寧厭病，默坐對諸生。

尚書時有

疾瘖

和尉遲贊善秋暮僻居

登高節物最堪憐，小嶺疎林對檻前。
輕吹斷時雲縹緲，夕陽明處水澄鮮。
江城秋早催寒事，望苑朝稀足晏眠。
庭有菊花罇有酒，若方陶令媿猶賢。

和陳贊善致仕還京口

海門山下一漁舟，中有高人未白頭。
已駕安車歸故里，尚通閨籍在龍樓。
泉聲漱玉窗前落，江色如烟檻外流。
今日君臣厚終始，不須辛苦畫雙牛。

京使廻自臨川得從兄書寄詩依韻和

珍重還京使殷勤話故人
別離長挂夢寵祿不關身
趣向今成道聲華舊絕塵
莫嗟容髮老詩句逐時新

陪鄭王相公賦簷前垂冰應教依韻

窗外虛明雪乍晴
簷前垂溜盡成冰
長廊瓦疊行行密
晚院風高寸寸增
玉指乍拈簪尚媿
金堦時墜磬難勝
晨飡堪醒曹參酒
自恨空腸病不能

送禮部潘尚書致仕還建安

名遂功成累復輕
鱸魚因起舊鄉情
履聲初下金華省

帆影看離石首城
化劍津頭尋故老
同亭會上問仙卿
冥鴻高舉真難事
相送何須淚滿纓

和尉遲贊善病中見寄

仙郎移病暑天過
却似冥鴻避尉羅
晝夢乍驚風動竹
夜吟時覺露沾莎
情親稍喜貧居近
性懶猶嫌上直多
望苑恩深期勿藥
青雲歧路未蹉跎

池州陳使君見示遊齊山詩因寄

徃歲曾遊弄水亭
齊峰濃翠暮烟橫
哀猿出檻心雖喜

傷鳥聞弦勢易驚病後簪纓殊寡興老來泉石倍關情
今朝池口風波靜遙賀山前有頌聲

再領制誥和王明府見賀

蹇步還依列宿邊拱宸重認舊雲天自嗟多難飄零困
不似當年膽氣全雞樹曉花疎向日龍池輕浪細含烟
從來不解為身計一葉悠悠任大川

送高舍人使嶺南

西掖官曹近南溟道路遙使星將渡漢仙棹乍乘潮柳

映靈和折梅依大庾飄江帆風浙浙山館雨瀟瀟陸賈
真迂濶終童久寂寥送君何限意把酒一長謠

和王明府見寄

時情世難消吾道薄宦流年厄此身莫歎京華同寂寞
曾經兵革共漂淪對山開戶唯求靜貰酒留賓不道貧
善政空多尚淹屈不知誰是解憂民

和方秦州見寄

逐客悽悽重入京舊愁新恨兩難勝雲收楚塞千山雪

風結秦淮一尺冰
置醴筵空情豈盡
投湘文就思如凝
更殘月落知孤坐
遙望船窗一點星

文獻太子挽歌詞五首

國有承祧重人知
秉哲尊清風來望苑
遺烈在東藩此
日升緱嶺何因到
寢門天高不可問
烟靄共昏昏

夏啓吾君子周儲
上帝賓音容一飄忽
功業自紛綸露
泣承華月風驚麗
正塵空餘商嶺客
行哭下宜春

出處成交讓經綸
有大功淚碑瓜步
北棠樹蒜山東百

揆方時叙重離遂不融故臣偏感咽會是歎三窮
甲觀光陰促園陵天地長簫笳咽無韻賓御哭相將盛
烈傳彝鼎遺文披樂章君臣知己分零淚亂無行

綵仗清晨出非同齒胃時愁烟鏢平甸朔吹繞寒枝楚
客來何相緱山去莫追迴膽飛蓋處掩袂不勝悲

送王員外宰德安

家世朱門貴官資粉署優今為百里長應好五峰遊柳
影連彭澤湖光接庾樓承明須再入官滿莫淹留

以端溪硯酬張員外水晶珠兼和來篇

請以端溪潤酬君水玉明方圓雖異器功用信俱呈自得山川秀能分日月精巾箱各珍重所貴在交情

奉使九華山中途遇青陽薛郎中

故人相別動相思此地相逢豈素期九子峯頭閒未得五谿橋上坐多時甘泉從幸予知忝宣室徵還子未遲且飲一杯消別恨野花風起漸離披

奉命南使經彭澤

值王明府不在留此

遠使程途未一分
離心常要醉醺醺
那堪彭澤門前立
黃菊蕭疎不見君

南都遇前嘉魚劉令言遊閩嶺作此與之

我持使節經韶石
君作閒遊過武夷
兩地山光成獨賞
隔年鄉思暗相知
洪崖壇上長岑寂
孺子亭前自別離
珍重分歧一杯酒
強加飡飯數吟詩

閣阜山

殿影高低雲掩映
松陰繚繞步徘徊
從今莫厭簪裾累

金方口月之... 卷四
不是乘輅不得來

玉笥山留題

仙鄉會應遠王事知何極
征傳莫辭勞玉峯聊一息
形骸已消散心想多凝寂
貞氣自清虛非關好松石
九仙皆積學洞壑多遺跡
遊手歸去來胡為但征役

廬陵別朱觀先輩

桂籍知名有幾人
翻飛相續上青雲
解憐才子寧唯我
遠作卑官尚見君
嶺外獨持嚴助節
宮中誰薦長卿文

新詩試為重高詠朝漢臺前不可聞

文或少卿文山郎中交好深至二紀已餘睽別
數年二子長逝奉使嶺表途次南康弔孫氏
之孤於其家覩文或手書於僧室慷慨悲歌
留題此詩

孫家虛座弔諸孤張叟僧房見手書二紀歡遊今若此
滿衣零淚欲何如腰間金印從如斗鏡裏霜華已滿梳
珍重遠公應笑我塵心唯此未能除

朱處士相與有山水之願見送至南康作此以

別之

憐君送我至南康更憶梅花庾嶺芳多少
仙山共遊在願君百歲尚康強

清明日清遠峽作

嶺外春過半途火又新殷勤清遠峽留戀北歸人
迴至南康題紫極宮裏道士房

王事信靡盬飲水安足辭胡為擁征傳乃至天南陲天

南非吾鄉留滯忽踰時還經羽人家豁然雲霧披何以
寬吾懷老莊有微詞達士無不可至人豈偏為客愁勿
復道為君吟此詩

和歙州陳使君見寄

新安風景好時令肅轅門身貴心彌下功名口不言
鈐家法在儒雅素風存簪履偕遊盛鄉閭俗化敦臨窗
山色秀遶郭水聲喧纒緝文章麗矜嚴道義尊樓臺秋
月靜京庾晚雲屯曉吹傳衙鼓晴陽展信幡一篇貽友

好千里倍心論未見歸驂動空能役夢魂

和賈員外戲見贈玉蘂花栽

瓊瑤一簇帶花來便劖蒼苔手自栽喜見唐昌舊顏色
為君判病酌金壘

光穆皇后挽歌三首

仙馭期難改坤儀道自光閔宮新表德沙麓舊膺祥素
帟堯門揜凝笳畢陌長東風慘陵樹無復見親桑

永樂留虛位長陵啟女扉返虞嚴吉仗復土揜空衣功

業投三母光靈極四妃唯應彤史在不與露花晞
隱隱閭門路烟雲曉更愁空瞻金輅出非是濯龍遊德
感人倫正風行內職修還隨偶物化同此畏軒丘

嚴相公宅牡丹

但是豪家重牡丹爭如丞相閣前看鳳樓日暖開偏早
雞樹陰濃謝更難數朵已應迷國艷一枝何幸上塵冠
不知更許憑欄否爛漫春光未肯殘

侍宴賦得歸雁

夜靜羣動息翩翩一雁歸清音天際遠寒影月中微何處雲同宿長空雪共飛陽和常借便免與素心違

又賦早春書事

苑裡芳華早皇家勝事多弓聲達春氣奕思養天和煖酒紅爐火浮舟綠水波雪晴農事起擊壤聽賡歌

薔薇詩一首十八韻呈東海侍郎太尉中書令鄭王從善

綠影覆幽池芳菲四月時管絃朝夕興組繡百千枝盛

引牆看遍高煩架屢移露輕濡綵筆蜂悞拂吟髭日照
瓊瓏幔風搖翡翠帷早紅飄蘚地狂蔓挂蛛絲嫩刺牽
衣細新條宰草垂晚香難暫捨嬌態自相窺深淺分前
後容華互盛衰樽前留客久月下欲歸遲何處繁臨砌
誰家密映籬絳羅房燦爛碧玉葉參差分得殷勤種開
來遠近知晶熒歌袖袂柔弱舞腰支膏麝誰將比庭萱
合自唾勻粧低水鑑泣淚滴烟靄畫擬憑梁廣名宜亞
楚姬寄君十八韻思拙媿新奇

依韻和令公大王薔薇詩

綠樹成陰後，羣芳稍歇時。誰將新濯錦，挂向最長枝。卷箔香先入，凭欄影任移。賞頻嫌酒渴，吟苦怕霜髭。架迫籠雲幄，庭虛展繡帷。有情縈舞袖，無力冒遊絲。嫩蘂鶯偷采，柔條柳伴垂。荀池波自照，梁苑客常窺。玉李尋皆謝，金桃亦暗衰。花中應獨貴，庭下故開遲。委艷粧苔砌，分華借槿籬。低昂勻灼爍，濃淡疊參差。幸植王宮裏，仍逢宰相知。芳心向誰許，醉態不能支。芍藥天教避，玫瑰

衆共唾光明烘畫景潤膩衰輕霽麗似期神女珍加重
衛姬君王偏屬詠七子盡搜竒

和門下殷侍郎新茶二十韻

暖吹入春園新芽競粲然才教鷹嘴拆未放雪花妍荷

杖青林下携竿旭景前

採茶須在日未出前

孕靈資雨露鍾秀白

山川碾後香彌遠烹來色更鮮名隨土地貴味逐水泉

遷力藉流黃暖形模紫筍圓

茶之美者有圓捲紫筍

正當鑽柳火

遙想湧金泉

陽羨茶山有金沙泉修貢時出

任道時新物須依古法煎

輕甌浮綠乳，孤竈散餘烟。甘齋非予匹，宮槐讓我先。

槐芽

亦可為茶竹孤空冉冉，荷弱謾田田。解渴消殘酒，清神感夜

眠。十漿何足饋，百榼盡堪捐。採擷唯憂晚，營求不計錢。
任君因焙顯，陸氏有經傳。愛甚真成僻，嘗多合得仙。亭
臺虛靜處，風月艷陽天。自可臨泉石，何妨雜管絃。東山
似蒙頂，願得從諸賢。

騎省集卷四

欽定四庫全書薈要卷一萬四千一百

集部

騎省集卷五

宋 徐鉉 撰

詩七十一首

春雪應制

繁陰連曙景瑞雪灑芳辰
勢密猶疑臘風和始覺春
繁
林開玉蘂飄座裏香塵欲
識宸心悅雲謠慰兆人

進雪詩

欲使新正識有年故飄輕絮伴春還
近看瓊樹籠銀闕

遠想瑤池帶玉關
潤迤躐鋪綠野暖
隨杯酒上朱顏
朝來花萼樓中宴
數曲賡歌雅頌間

自題山亭三首

簪組非無累
園林未是歸
世喧長不到
何必過山薇
小舫行乘月
高齋卧看山
退公聊自足
爭敢望長閒
跂石仍臨水
披襟復掛冠
機心忘未得
碁局與魚竿
和陳表用員外求酒

暑天頻雨亦頻晴
簾外閒雲重復輕
珍重一壺酬絕唱

向風遙想醉吟聲

奉和右省僕射西亭高卧作

院靜蒼苔積庭幽怪石欹
蟬聲當檻急虹影向簷垂
晝漏猶憐永叢蘭未覺衰
疎篁巢翡翠折葦覆鸕鷀
對酒襟懷曠圍碁旨趣遲
景皆隨所尚物各遂其宜
道與時相會才非世所羈
賦詩貽座客秋事爾何悲

憶新淦觴池寄孟賓于員外

往年淦水駐行軒引得清流似月圓
自有溪光還碧甃

不勞人力遞金船
潤茲苔蘚欺茵席
聲入杉松當管絃
珍重詩人頻管領
莫教塵土咽潺湲

右省僕射後湖亭閑宴鉉以宿直先歸賦詩留
獻

湖上一陽生
虛亭啓高宴
楓林烟際出
白鳥波心見
主人志貴達
座客容疵賤
獨慙殘照催
歸宿明光殿

送孟賓于員外還新淦

暫來城闕不從容
却佩銀魚隱玉峰
雙澗水邊歌醉石

九仙臺下聽松風
題詩翠壁稱逋客
採藥春畦狎老農
野鶴乘軒雲出岫
不知何日再相逢

孟君別後相續見書作此酬之

多病却煩暑短才憂近職
跣足北窗風遙懷浩無極
故人易成別詩句空相憶
尺素寄天涯淦江秋水色

納后夕侍宴

天上軒星正雲間湛露垂
禮容過渭水宴喜勝瑤池
彩霧籠花燭升龍肅羽儀
君臣歡樂日文物盛明時
簾捲

銀河轉香凝玉漏遲華封傾祝意觴酒與歌詩

又三絕

時平物茂歲功成重翟排雲到玉京四海未知春色至
今宵先入九重城

銀燭金爐禁漏移月輪初照萬年枝造舟已似文王事
卜世應同八百期

漢主承乾帝道光天家花燭宴昭陽六衣盛禮如金屋
綵筆分題似柏梁

北苑侍宴雜詠詩

竹

勁節生宮苑，虛心奉豫遊。
自然名價重，不羨渭川侯。

松

細韻風中遠，寒青雪後濃。
繁陰堪避雨，効用待東封。

水

碧草垂低岸，東風起細波。
橫汾從遊宴，何謝到天河。

風

昨朝才解凍今日又開花帝力無人識誰知玩物華

菊

細麗披金彩氤氳散遠馨
汎杯頻奉賜緣解制頽齡

柳枝詞十首座中應制

金馬詞臣賦小詩梨園弟子唱新辭
君恩還似東風意先入靈和蜀柳枝

百草千花共待春綠楊顏色最驚人
天邊雨露年年在上苑芳華歲歲新

長愛龍池二月時
毵毵金線弄春姿
假饒葉落枝空後
更有梨園笛裏吹

綠水成文柳帶搖
東風初到不鳴條
龍舟欲過偏留戀
萬縷輕絲拂御橋

百尺長條踈麴塵
題詩不盡畫難真
憑君折向人間種
還似君恩處處春

風暖雲開晚照明
翠條深映鳳凰城
人間欲識靈和態
聽取新詞玉管聲

醉折垂楊唱柳枝金城三月走金羈年年為愛新條好
不覺蒼華也似絲

新春花柳競芳姿偏愛垂楊拂地枝天子徧教詞客賦
宮中要唱洞簫詞

凝碧池頭蘸翠漣鳳凰樓畔簇晴烟新詞欲詠知難詠
說與雙成入管絃

侍從甘泉與未央移舟偏要近垂楊櫻桃未綻梅花老
折得柔條百尺長

奉和宮傅相公見寄懷舊四十韻

謝傅功成德望全，鸞臺初下正蕭然。
搏風乍息三千里，感舊重懷四十年。
西掖新官同賈馬，南朝興運似開天。
文詞職業分工拙，流輩班資讓後先。
每媿陋容勞刻劃，長慙頑石費雕鐫。
晨趨綸掖消春水，夕會精廬待月圓。
立馬有時同草詔，聯鑣幾處共成篇。
閔歌柳葉翻新曲，醉詠桃花促綺筵。
少壯况逢時世好，經過寧慮歲華遷。
雲龍得路須騰躍，社櫟非材合棄捐。
再謁湘江猶是幸

西還宣室竟何緣
已知瑕玷勞磨瑩
又得官司重接連
聽漏分宵趨建禮
從遊同名赴甘泉
雲開閭闔分臺殿
風過華林度管絃
行止不離宮仗影
衣裾常惹御爐烟
師資稷契論中禮
依止山公典小銓
多謝天波垂赤管
敢教晨景過華墀
翔飛附驥方經遠
巨楫迎風遂濟川
玉燭調時鈞軸正
台階平處德星懸
巖廊禮絕威容肅
布素情深友好偏
長擬營巢安大厦
忽驚操鉞領中權
吳門日麗龍銜節
京口沙晴鷁畫船
蓋代名高方赫赫

戀恩心切更乾乾
袁安辭氣忠仍懇
吳漢精誠直且專
却許丘明師紀傳
更容疏廣奉周旋
朱門自得施行馬
厚祿何妨食萬錢
密疏尚應勞獻替
清談唯見論空玄
東山妓樂供閒步
北牖風涼足晏眠
玄武湖邊林隱見
五城橋下棹洄沿
會移苑樹開紅藥
新鑿家池種白蓮
不遣前驕妨野逸
別尋逋客互招延
碁枰寂靜陳虛閣
詩筆沉吟劈彩箋
往事偶來春夢裏
閒愁因動落花前
青雲舊侶嗟誰在
白首親情倍見憐
盡日凝思殊悵望

一章追叙信精研韶顏莫與年爭競世慮須憑道節宣
幸喜諸生為將相定由陰德致神仙羊公刺有登臨興
尚子都無嫁娶牽退象天山鎮浮競起為霖雨潤原田
從容自保君臣契何必扁舟始是賢

相公垂覽和詩復貽長句輒次來韻

西院春歸道思深披衣閑聽暝猿吟鋪陳政事留黃閣
偃息神機在素琴塵柄暫時疎末座瑤華頻復惠清音
開晴便作東山約共賞烟霞放曠心

九日落星山登高

秋暮天高稻穞成，落星山上會諸賓。
黃花汎酒依流俗，白髮滿頭思故人。
巖影晚看雲出岫，湖光遙見客垂綸。
風烟不改年長度，終待林泉老此身。

十日和张少監

重陽高會古平臺，吟徧秋光始下來。
黃菊後期香未減，新詩捧得眼還開。
每因佳節知身老，却憶前歡似夢回。
且喜清時屢行樂，是非名利盡悠哉。

御筵送鄧王

禁裡秋光似水清
林烟池影共離情
暫移黃閣只三載
却望紫垣都數程
滿座清風天子送
隨車甘雨郡人迎
綺霞閣上詩題在
從此還應有頌聲

和張少監晚菊

憶共庭蘭倚砌栽
柔條輕吹獨依隈
自知佳節終堪賞
為惜流光未忍開
采擷也須盈掌握
馨香還解滿樽罍
今朝旬假猶無事
更好登臨汎一杯

送馮侍郎

聞君竹馬戲毗陵
誰道觀風自六卿
今日聲明光舊物
共看旌旆擁書生
斬蛟樓下谿烟碧
射虎亭邊草路清
應念筵中倍離恨
老來偏重十年兄

又絕句寄題毗陵驛

會持使節駐毗陵
長與州人有舊情
為向驛橋風月道
舍人髭髮白千莖

陳侍郎宅觀花燭

今夜銀河萬里秋
人言織女嫁牽牛
珮聲寥亮和金奏
燭影熒煌映玉鈎
座客亦從天子賜
更籌須為主人留
世間盛事君知否
朝下鸞臺夕鳳樓

送蕭尚書致仕歸廬陵

江海分飛二十春
重論前事不堪聞
主憂臣辱誰非我
曲突徙薪唯有君
金紫滿身皆外物
雪霜垂領更離羣
鶴歸華表望不盡
玉筍山頭多白雲

賦得秋江晚照

落日照平流，晴空萬里秋。
輕明動楓葉，點的亂沙鷗。
罾網魚梁靜，簦蓋稻穠收。
不教行樂倦，冉冉下城樓。

奉和子龍大監與舍弟贈答之作

石渠東觀西優賢，明主知臣豈偶然。
鴛鴦分行皆接武，金蘭仝好共忘年。
懷恩未遂林泉約，竊位空慙組綬懸。
多少深情知不盡，好音相慰強成篇。

史館庭梅見其毫末，歷載三十，今已半枯。常僚諸公唯相公與鉉在耳，覩物興感，率成短篇。

謹書獻上伏惟垂覽

東觀婆娑樹曾憐甲坼時繁英共攀折芳歲幾推移往
事皆陳跡清香亦暗衰相看宜自喜雙鬢合垂絲

鼎臣學士侍郎以東館庭梅昔翰苑之毫末今
復半枯向時全條零落都盡素髮垂領茲唯
二人感舊傷懷發於吟咏惠然好我不能無
言輒次來韻奉攀和 悅

憶見萌芽日還憐合抱時舊歡如夢想物態暗還移素

艷今無幾朱顏亦自衰樹將人共老何暇更悲絲

再次前韻代梅答

託植經多稔頃年向盛時枝條雖已改情分不曾移莫
訝堦前老還同鏡裡衰更應憐墮葉殘吹挂蟲絲

太傅相公深感庭梅再成絕唱曲垂借示倍仞
知憐謹用舊韻攀和

禁省繁華地含芳自一時雪英開復落紅藥植還移

謂嘗

為翰林又靜想分今昔頻吟歎盛衰多情共如此爭免
為史錄

鬢成絲

太傅相公以東觀庭梅西垣舊植昔陪盛賞今
獨家元唱和之餘俾令攀和輒依本韻伏媿

斐然 錯

靜對含章樹

漢有含章
簷下樹

閒思共賞時香隨荀令在根異

武昌移物性雖搖落人心豈變衰唱酬勝笛曲來徃韻

朱絲

鼎臣學士侍郎楚金舍人學士以再傷庭梅詩

同垂寵和清絕感歎情致俱深因成四十字

陳謝悅

人物同遷謝重成念舊悲連華得瓊玖合奏發塤篪餘
枿雖無取殘芳尚獲知問君何所以珍重杜秋詩

太傅相公以庭梅二篇許舍弟同賦再迂藻思
曲有虛稱謹依韻奉酬用申感謝 鉉

舊眷終無替流光自足悲攀條感花萼和曲許塤篪前
會成春夢向人更已知緣情聊借喻爭敢道言詩

太傅相公與家兄梅花酬唱許綴末篇再賜新
詩俯光拙句謹奉清韻伏惟采覽 錯

重歎梅花落非關塞笛悲論文叨接萼末曲媿吹簾枝
逐清風動香因白雪知陶鈞數友悌更賦邵公詩

和鍾太監汎舟同遊見示

潮溝橫趣北山阿一月三遊未是多老去交親難暫捨
閒中滋味更無過溪橋樹映行人渡村逕風飄牧豎歌
孤槿亂流偏有興滿川晴日弄微波

又和遊光睦院

寺門山水際清淺照孱顏
客權晚維岸僧房猶揜關
日華穿竹靜雲影過階閒
箕踞一長嘯忘懷物我間

和張少監舟中望蔣山

谿路向還背前山高復重
紛披紅葉樹間鬪白雲峯
盡日慵移櫂何年醉倚松
自知閒未得不敢笑周顒

御製茱萸詩

萬物慶西成茱萸獨擅名
房排紅結小香透夾衣輕
宿

露沾獨重朝陽照更明長和黃菊酒高宴奉西清

奉和御製茱萸

臺畔西風御果新芳精彩麗蕭辰柔條細葉粧治好
紫蒂紅芳點綴勻幾朶得陪天上宴千株長作洞中春
今朝聖藻偏流詠黃菊無由更敢鄰

蒙恩賜酒奉旨令醉進詩以謝

明光殿裡夜迢迢多病逢秋自寂寥

臣以病戒酒多時

蠟炬乍

傳丹鳳詔御題初認白雲謠今宵幸識衢樽味明日知

停入閣朝為感君恩判一醉不煩辛苦解金貂

秋日泛舟賦菊花

素艷擁行舟清香覆碧流遠香分的的輕浪泛悠悠雨
歇平湖滿風涼運瀆秋今朝流詠處即是白蘋洲

題梁王舊園

梁王舊館枕潮溝共引垂藤繫小舟樹倚荒臺風淅淅
草埋欹石雨脩脩門前不見鄒枚醉池上時聞雁鷺愁
節士逢秋多感激不須頻向此中遊

奉詔度支陳員外

古來賢達士馳騫唯羣書非禮誓弗習違道無與居儒
家若迂濶遂將世情疎吾友嗣世德古風藹有餘幸遇
漢文皇握蘭佩金魚俯視長沙賦恹恹將焉如

明道人歸西林求題院額作此送之

昔從岐陽路簪纓滿翠微十年勞我夢今日送師歸曳
尾龜應樂乘軒鶴謾肥含情題小篆將去挂巖扉

送宣州丘判官

憲署遊從阻平臺道路賒喜君馳後乘於此會仙槎緩
酌遲飛蓋微吟望綺霞相迎在春渚暫別莫咨嗟

北使還襄邑道中作

九月三十日

九月三十日獨行梁宋道河流激似飛林葉翻如掃程
遙苦晝短野迴知寒早還家亦不閒要且還家了

禁中新月

今夕拜新月沉沉禁署中玉繩踈間彩金掌靜無風節
換知身老時平見歲功吟看北墀暝蘭燼墜微紅

觀吉王花燭

王門嘉禮萬人觀
况是新承置醴歡
花燭喧闐丞相府
星辰搖動遠遊冠
歌聲暫闕聞宮漏
雲影初開見露盤
帝里佳期頻賦頌
長留故事在金鑿

綦賄賦詩輸劉起居真

刻燭知無取
爭先素未精
本圖忘物我
何必計輸贏
賄豎終規利
焚囊亦近名
不如相視笑
高詠兩三聲

春盡日遊後湖贈劉起居

劉時方
燒藥

今朝湖上送春歸
萬頃澄波照白髭
笑折殘花勸君酒
金丹成熟是何時

送察院李侍御使廬陵因寄孟員外

繡衣乘驛急如星
山水何妨寄野情
肯向九仙臺下歇
閒聽孟叟醉吟聲

後湖訪古各賦一題得西邨

南朝藩閩地八友
舊招尋事徃山光
在春晴草色深曲
池魚自樂叢桂烏
頻吟今日中興運
猶懷翰墨林

送德邁道人之豫章

禪靈橋畔落殘花
橋上離情對日斜
顧我乘軒慙組綬
羨師飛錫指烟霞
樓中西嶺真君宅
門外南州處士家
莫道空談便無事
碧雲詩思更無涯

送陳秋監歸泉州

風滿潮溝木葉飛
水邊行客駐驂騑
三朝恩澤馮唐老
萬里鄉關賀監歸
世路窮通前事遠
半生談笑此心違
驪歌不識高堂慶
特地令人淚滿衣

又聽霓裳羽衣曲送陳君

清商一曲遠人行
桃葉津頭月正明
此是開元太平曲
莫教偏作別離聲

又題白鷺洲江鷗送陳君

白鷺洲邊江路斜
輕鷗接翼滿平沙
吾徒來送遠行客
停舟為爾長歎息
酒旗漁艇兩無猜
月影蘆花鎮相得
離筵一曲怨復清
滿座銷魂鳥不驚
人生不及水禽樂
安用虛名上麟閣
同心攜手今如此
金鼎丹砂何寂寞

天涯後會渺難期從此又應添白髭願君不忘分飛處
長保翩翩潔白姿

騎省集卷五

謹案卷四第八頁前二行玉霄壁閑人長在原本
玉訛巫閉訛開據宋詩鈔改

第十四頁後五行六行九子峯頭閒未得五谿橋
上坐多時原本子訛年橋訛樓據宋詩鈔改

第十四頁後七行且飲一杯消別恨野花風起漸
離披按宋詩鈔飲作喜漸作便


第十五頁前三行作此與之原本與訛興據宋詩
鈔改

第十六頁前三行四行弔孫氏之孤於其家原本
弔訛予又慷慨悲歌原本歌訛歡並據宋詩鈔

改

第十九頁後三行賞類嫌酒渴原本渴訛湯今改
卷五第四頁後三行緣解制類齡原本緣訛綠類

訛透今並改



總校官庶吉士臣張能照

校對官學正臣李巖

謄錄監生臣蔣繼煥